

新刻張太岳先生文集

新刻張太岳先生文集卷十三

光祿大夫柱國少傅兼太子太傅吏部尚書建
極殿大學士贈太保謚文簡豫所呂公墓誌銘
萬曆庚辰元日豫所呂公卒於家計聞上輟朝一
日詔所司議卹典諭祭十有一壇遣官營葬贈太
保謚文簡廕一子中書舍人諸視常數有加而公之
子祠部與周遣人持吳大恭國倫所爲狀來請余志
公墓而銘焉按謚法平易不訾曰簡一德不懈亦曰
簡余與公同政府知公深公爲人外溫而心辨中毅
而貌和於事訥訥不輕爲可否於人恂恂不苟爲異

同嘗曰大臣協心體國苟利社稷嫌怨共之安事羯
羗其間無論彼已懍伎卽賢者各是所見政本之地
斷斷而爭如國體何世儒嚶嚶猥小曹參而甲丙吉
然則虞廷云寅恭者非邪自介柄政與公共事者六
年內奉 沖聖勤緝熙外贊密勿定計畫莫逆於心
莫違於口六年如一日也蓋誠所謂不訾不懈者斯
可以爲簡也已 上嘗手書賜公曰樞機克慎曰同
心夾輔知臣莫如 王信哉按狀公信呂名調陽字
和卿別號豫所西粵桂林人也其先楚興國之大冶
人洪武初從軍戍天長後踐更桂林曰鑑者始卽家

桂林是爲公會祖鑑生綱綱生璋呂氏文學自綱始
世爲郡諸生而璋以貢爲徐聞令徐聞人尸祝之璋
二子長應陽蚤卒次卽公正德丙子中春母張夫人
夢巨蟒入室紫光煜煜寤而生公公生十九年爲嘉
靖甲午舉於鄉庚戌賜及第第二人授翰林編修癸
亥稍遷國子司業乙丑擢春坊諭德隆慶改元遷南
京國子祭酒尋改國子祭酒是冬擢南京禮部侍郎
戊辰改禮部侍郎莊皇帝講讀踰年改吏部尋以吏
部左侍郎兼翰林學士掌詹事府事壬申上初卽
位拜禮部尚書頃之上問余孰可與卿同事者余

以公對 上在東宮亦雅知公端慎遂召爲文淵閣
大學士與機務踰年進太子太保甲戌修 穆廟實
錄成加少保直武英殿尚書如故丙子一品秩滿進
少傅兼太子太傅吏部尚書直建極殿公先後歷官
垂三十年半守史局三任成均四歷卿貳春坊典

內制詹府教習庶吉士少宗伯日侍 講讀凡總修

嘉隆實錄者再分校丙辰副辛未與甲戌會試考者
三所事咸稱在禮部釐正典章自 宗藩外戚中常
侍不得踰制有所希請諸曹郎吏廩廩奉職由大宗
伯入內閣若 大喪若 大婚若崇 親薦 號若

降夷受俘諸鉅儀曠事成藉公相成以當上心

上優禮公稱先生不名數命分獻郊廟釋奠

先師時遣中官給賜上尊珍膳兼金文騎乘馬什器之屬不可勝計多自昔輔臣所未嘗蒙公故病肺又患足痿顧念恩厚未忍言去久之益劇戊寅秋乃踈乞骸骨上固不許諭留甚温踈十上始得

請賜帑金文綯乘傳歸仍遣御醫視疾行人護行聽其子興周以祠部扶持公於家居一歲疾良已會歲暮公晨對客食飲如常日中忽不語越三日元旦自起櫛沐端坐卒年六十有四公沉密簡重人莫窺其

際嘗游國學從祭酒永康程先生談名理後公爲祭
酒遂以永康學教授諸生先德而後藝以其身爲型
範爲詩若文古雅醇厚不事模擬性尤澹泊雖蟒玉
未嘗去澣衣門無私謁所樹惟恐見知所急惟恐見
德頃平古田及懷遠府江當事者皆從公受策然公
不自言人故無所藉以頌公公先娶朱夫人一歲卒
繼張夫人名家子能以賢孝佐公初第時將父母郵
中躬暨張奉七箸上食惟謹夜中其父母咸中煤毒
公從夢中心動若有促之起者卽與張夫人起視則
父母俱僵卧不能言急汲水沃之乃甦人以爲孝感

久之以編修滿封父母如其官奉之歸蓋封四年而
奔父喪及禫又喪母哀瘁骨立後以少保總裁 寶
錄成贈曾大父大父父皆如公官妣皆一品夫人配
張累封一品夫人少傅滿廕一子中書舍人先是南
都會 恩廕一子入監讀書及卹廕凡三而公四子
長興周旣舉進士爲祠部次興齊又以公歸之明年
舉於鄉次興文興武振振濟美世且滋大周娶湖廣
叅議宋廷表女齊娶太僕丞秦致恭女文聘封川令
陶景女武聘興國吳叅政國倫女女四少者未字壻
舉人毛如綸諸生蕭如蒞常任孫一嗣簡聘延郡丞

屠炳言女公雖籍桂林數往來道與國省族展墓比
其歸也視所治新第徘徊不能去又新構於興國語
吳大叅曰吾先君命諸孫名皆從興以示不忘故鄉
明年吾其以家來菟裘於斯矣會公卒不果公質行
多長厚余獨心服其在政府斷斷乎有古大臣之風
焉銘曰稽古盛際同寅協恭百僚師師以洽時雍譬
伯與仲響和景從誠一無他深厚有容在漢丙吉今
也則公 主少不疑仰德乃風內寧外謐波恬漠空
安時熙歲豐守和自近孰知其功我銘貞石
以著樸忠

光祿大夫柱國少師兼太子太師吏部尚書贈
太保謚襄毅楊公墓誌銘

晉地表裏山河其人瓌瑋多大節能以功名自顯往
古無論自余登朝則見故少師太宰楊公心竊嚮慕
之公亦與余爲忘年之契公在本兵久又徧歷諸鎮
躬履戎行練習邊事余每從公問今中國所以制禦
夷狄之策及九塞險易將士能否公悉爲余道所以
如指諸掌故自余在政府所措畫邊事蓋得之公爲
多今上登極首命公還秉銓衡余受先帝遺託
方欲與公同心戮力共佐休明而公已矣嗟乎天不

懃遺一老用輔 英主惜哉然其生平所建立咸足
以方駕往哲炳耀後襟余知之素深謹識其大者用
垂不朽公諱博字惟約別號虞坡幼穎敏讀書能五
行俱下十七舉於鄉弱冠登進士授陝西藍屋令調
長安用治行第一徵爲兵部武庫司主事陞郎中會
肅皇帝南狩承天起閣學翟文懿公爲行邊使以公
參幕府起遼左至甘肅行萬餘里所至輒有疏記悉
得其肯綮至肅州屬番數百人遮道邀賞文懿欲勿
予不能予之恐來者益衆無以應之公請文懿坐堂
上嚴儀衛跪諸番轅門外數之曰相公奉 詔勞軍

若等宜傾巢遠逐乃泄泄若此何也諸蕃咸懾服莫敢仰視久乃釋之稍賚其先至者諸夷落聞之方懼以後至見讓莫敢復來文懿以公爲敏入朝薦公才堪大任嘉靖辛丑壬寅虜數入宣大山西公爲職方郎中羽檄旁午應機立斷其所規畫靡不當 上意指安南不庭廟議發兵討之公請先之以文告會安南請降公謂小醜不足煩王師宜許以自新因上便宜六事 肅皇帝用其策交人遂款服至今已從職方出爲山東督學憲副陞叅政丙午以僉都御史巡撫甘肅初罕東諸屬番畏土魯番侵擾避居肅州境

上久之其衆滋繁邊人患之公召諸番酋犒以牛酒
因語之曰若輩久羈於此既不能歸胡不爲久遠計
諸酋曰爲計奈何公曰此去某處水草甘美吾爲若
築城堡作渠壩給耕具使若等定居長爲藩蔽如何
諸酋咸頓首曰幸甚公乃築白城威虜金塔等七城
稍給與牛具器用諸酋率其部落數千人徙居之離
塞遠者四五百里河西益少胡患乃鑿龍首等渠墾
田萬餘頃又請以巡按御史兼督學政如遼東例富
而教之肅州遂爲重鎮虜畏不敢近塞間一入盜將
士奮擊斬首百四十餘級上賜璽書加獎晉副都

御史庚戌丁母憂西人擁道泣送車不能行是歲虜
大入薊薄都城癸丑起公兵部侍郎經畧薊鎮築潮
河川墩以遏虜衝簡將士汰冗弱軍聲大振事竣
詔遂留督薊遼保定軍務無何虜復寇古北口號二
十萬連營百餘里公擐甲登陣督諸軍禦之築石藜
射所殺傷甚衆一虜先登及雉我軍斫其腕墮虜氣
阻乃退公募死士持火器夜襲其營一夕四五驚虜
衆宵遁捷聞 賜豸緋衣一襲晉右都御史廕一子
錦衣衛百戶明年虜以萬騎入馬蘭谷公督兵擊走
之幾獲其酋打來孫公在薊二年虜再犯俱不得利

去乙卯入爲兵部尚書尋加太子少保丙辰丁父憂
戊午 詔還本兵時尚未終禫會虜圍大同右衛急
公倉卒奉 詔率師援之墨纒而往虜聞公出關曰
楊少保至矣遂遁右衛圍解 詔晉公太子太保兼
左副都御史暫留經畫大同事築牛心等墩堡二千
八百餘座濬濠塹三十里五十日而畢會虜入薊鎮
督臣被收又移公鎮薊公至虜遁乃 召公還理部
事加少保癸亥虜復寇薊督臣易之不爲備虜穿塞
入至通州烽火通於甘泉日夜圍上守禦方略虜尋
引去 上怒而誅督臣乙丑以一品再考厯一子國

子生丙寅改吏部尚書 肅皇上賓 穆宗踐祚請
錄忠諫舉遺佚蠲逋肆赦海內大悅丁卯一品三考
加少傅兼太子太傅再廢一子國子生公疏辭 恩
廢三請乃許其在銓衡所建論甚衆大率以錄舊德
抑浮薄課功能禁競趨爲務以故遊談之士頗不便
之左右倖臣亦不悅公遂爲所構謝政歸久之 上
寤乃起公以冢宰理本兵事萬曆改元 詔公還吏
部以一品四考晉少師兼太子太師仍廢一子國子
生所 賜賚甚厚癸酉奉 命分獻夕月壇疾竹扶
歸遂懇乞骸骨給傳歸數月而卒 上震悼爲輟朝

一日 賜祭葬贈太保謚襄毅廢一子爲中書舍人
蓋公生平行履其大者如此他固不能悉記也余嘗
謂世有大人有偉人其志翩翩其行巖巖其處於世
也卓然如秋峰之聳峙昂然如鷄羣之野鶴偉人也
其志淵淵其行桓桓其處於世也巍然如秦華之蟠
礴浩然如滄溟之含納大人也二人者語其才美標
格則大人似不若偉人之奇備要以閔滌與衍不言
而信不怒而威使人望而歸之世以爲衆父爲著龜
則大人之與偉人大有逕庭矣余觀公在 朝廷則
朝廷重在邊鄙則邊鄙重 國有大政議者盈庭或

日中不決公纔出數語衆已稱善排大難批大節應
手而擇恢恢尚有餘力九邊之士聞公來如見父母
驩躍鼓舞白刃在前不驅而赴嘉靖中疆場多故
肅皇帝以威斷馭下本兵督臣大者誅小者斥未嘗
終三歲不更置也惟公以敏練稱上意眷遇之隆
始終弗替在甘肅時嘗疏發咸寧侯仇鸞之奸鸞被
收下獄後更貴幸爲大將軍用事啣公甚深值分宜
當國縱其子干政願指百官公在本兵數以事見忤
相與排根中之者屢矣而竟不得間其後咸寧誅分
宜敗而公望愈重隆萬之間老成凋謝唯公歸然如

魯靈光爲海內所倚此其望實器業有越在風格之外者矣嗟乎非大人而能若是乎公所著有虞坡文集詩集雜著歷官奏議行於世生正德己巳月

日卒萬曆甲戌

月

日壽六十六其先弘農華陰

族也

國初有善甫者徙蒲遂爲蒲人曾祖謨祖選

父贍四川按察司僉事皆以公貴贈如其官曾祖妣張祖妣趙妣田皆贈一品夫人配段氏累封一品夫人諸子皆才賢段夫人生俊民嘉靖壬戌進士太僕少卿俊士萬曆甲戌進士鳳翔府推官俊彥官生俊卿隆慶武舉第一人管錦衣衛事指揮使女三長適

州學生景宣次適舉人馮淪次適嵩縣守備孫仲金
側室賀氏何氏賀生子俊臣官生何生女一孫男七
元禎元祥元祉元禧元祺元祐元祐孫女十四人太
僕兄弟將以 年 月 日葬公王庄之原 勅建
塋次持閣學張公狀屬余爲之銘曰世有大人龍德
正中吾聞其語今見于公維公之德智圓行方忠不
近名信不泥常李郭無文韓范無武公也兼之吉甫
召虎九牛在肆良庖趙趙公徐磔之遊刃有餘大棟
將傾見者懷懼公徐正之退無得色桓桓 世廟緯
武經文公媚 天子耆定策勲穆穆 莊皇垂衣拱

手公佐太平聲色不有迨於今皇兩作繼明詢茲黃髮還公宰衡我求一德惟公是與不弔昊天奪我心侶有謀孰諮有難孰夷山頽木壞愴矣其悲惟帝念功榮稱顯錫光光天寵賁此玄室不亡者壽不朽者名百世之下眎此刻銘

中憲大夫都察院右僉都御史霽寰吳公墓誌
銘

隆慶己巳二月廿日都御史孝豐吳公以病卒於家先數月今天子詔廷臣舉海內諸遺佚故臣可大用者議者咸欲以公應詔會公卒不克薦祠部乃

疏其巡撫貴州勦賊功得賜諭祭遣使臨視瑩兆
恩卹甚渥然不及公生時錄用俾資志以歿惜哉按
狀吳氏之先淮海人也宋南渡徙孝豐明興代有
聞人至吏部公松家大顯松二子長曰麟由御史歷
山東憲副次曰龍由吏部郎中歷叅政公憲副子也
母方氏封恭人公方在娠其大母張宜人夢神女遺
之子曰以爲而孫至大期又夢庭中柱石千仞屬天
憲副公亦夢舍後山高出雲端巖巖嶽立及生遂名
之曰維嶽長字峻伯別號霽寰公少秀穎絕倫十歲
能屬文弱冠舉浙江丁酉鄉試第五人明年登進士

授江陰令會崇明賊起邑與鄰壤故無城郭民大恐
公設備甚嚴賊不敢犯居三年用廉能徵入爲尚書
郎主比部奏牘奉 詔詳定周刑條例稱 旨著爲
憲令丁未同考會試庚戌虜寇塞直犯郊圻 先帝
怒收兵部尚書下吏趣具獄將誅之公從容言尚書
無大罪擬從未減 上不從竟誅尚書當是時 廷
中皆稱吳郎長者也慮囚江西所平反萬五百餘人
其尤著者徐濠以母故擊殺發塚之人劉福德以義
殺里中不孝子皆抵死公特原之人服其允事竣居
大父父母喪三年起補駕部郎中尋以按察副使督

山東學校修秩祀表節行飭三氏子孫奉約束以風
齊魯諸生每試諸生差第其文畢卽按籍察舉素無
行者褫其衣巾笞斥之卽以文在高等亦不貸齊魯
之士蒸蒸向風焉遷湖廣叅政江西按察使拜僉都
御史巡撫貴州兼制湖北川東道數上書言便宜事
詔皆如議土酋楊珂與其叔雄進有郤兵連數十歲
不解公使人諭珂自縛待以不死珂頓首伏罪事聞
賜白金文綺遂移兵誅王世麒於清浪捕宋廷武於
草塘俘王阿利於平伐諸夷畏服境內以平會有尚
書言貴州撫臣嚴急好興事不可以治夷者得旨

改南而公先有仲弟之喪居常邑邑遂謝病歸歸五
年而卒公自少雖以文雄於時而明練吏事嫻於當
時之務故所至有聲事事精辦然性高簡不能當世
取容頗爲庸衆人所嫉屢致顛阻初舉進士射策

大廷忌者匿其卷不得進抑居下列在江陰御史行
縣謁孔廟故事令以下皆蒲伏道候御史車過乃
起公獨立俟橋門外御史深嘆之始爲郎太宰熊公
知其賢欲薦補銓部屬以不往謁執政議格不行督
學山東三年一字不交於當路巡撫貴州有使者出
所部左右言使者貴人遇之宜有加公不從延接而

已使者以爲憾其被誦頗亦繇是然公不以寡偶之
故易其所操謝病山中讀書談道不復求用於世烈
且革循戒其子弟曰某子甲所饋朱衣母以歛其廡
節守義終身不變如此蓋嘉靖之季天下言風節者
稱浙中吳公公云公生以正德甲戌六月四日卒纔五
十有六初娶長興臧氏封安人贈恭人生子稼端邑
學生娶歸安陸侍郎女女三長適華亭國子生馮繼
可次適烏程國子生嚴應桂次適錢塘郡學生茅用
吉繼娶永嘉陳氏封恭人生子稼翊聘秀水項吏部
女稼登聘烏程閔茂才女女一許聘烏程閔世南初

公校士南宮所舉戴記士僅十人皆海內名儒其最顯者余與今少保濟南殷公並在政府婺源汪公爲御史中丞故餘姚胡公爲太常卿國子祭酒嘉興陸公爲太常少卿餘五人皆至藩臬郡守其卒也汪公狀其行殷公表其墓而余爲之銘銘曰謂公不達而應仕是都謂公達耶而讒口邾婁舍命不渝誰毀誰譽吁嗟云乎展也夫

封通議大夫兵部右侍郎兼都察院右僉都御史鏡川吳公暨配贈淑人合葬墓誌銘

鏡川吳公者今少司寇百朋之父也其先吳人也宋

紹興間有十五世曰慥者爲青田尉自青田徙義烏
之玄圃家焉代有聞人五世祖某某生某某生希采
以尚義捐貲賑乏有司聞於 朝爲旌其閭事具郡
志中大父文高父瀾母蔡氏其生以弘治辛亥四月
廿四日其官止鹽城縣學教諭其貴以子司寇君累
封通議大夫兵部右侍郎兼都察院右僉都御史其
卒以隆慶己巳十月十四日其壽七十有九其配初
娶蔡贈淑人繼金封淑人其葬在白瑕山之原其平
生行實則鄉人少宗伯諸君爲之狀而乞余銘狀曰
公諱璋字德純鏡川其別號也初穎異絕人長受業

于陽明先生之門人山陰朱宁中學益進歸補邑弟子貞善爲文督學使者咸奇之然以數奇不第嘉靖辛卯始應詔超等貢於京師授永城縣學訓導飭躬端教士皆樂從寧陵尹缺部使者檄公視篆數月邑中大治遷鹽城縣學教諭其教士悉如永城時嘗一攝邑事邑亦大治如寧陵然自以官薄不足展厥志頗厭宦游癸卯司寇君舉於鄉公乃歎曰吾有子矣遂棄官歸結廬城東山中讀書談道晏如也丁未司寇君舉進士授永豐尹治邑稱最拜監察御史累遷都察院右僉都御史撫治鄖陽已又從鄖陽轉

樞南顧皆封公如其官隆慶改元 今上登極用建
儲覃恩是時司寇君以勦賊功晉貳兵曹遂益封公
通議大夫兵部右侍郎兼都察院右僉都御史最凡
三益封而其父瀾母蔡夫人俱以例馳贈於是公移
書司寇君曰吾少苦學亦欲自見於世然官不過邑
博今汝貴爲三品通顯矣又蒙 上恩推及三世無
以報自今以往汝之身吾不敢有矣已巳司寇君從
留曹被 召改今官過里省公公老目眊不能視司
寇君不忍離上書乞侍養公固遣之曰奈何以我故
遲 君命會司寇君所上書亦寢不報遂涕泣而行

至京師數月而公卒司寇君號痛幾絕然公本教以急於三事勿卹其私固亦無憾也公少有至性事父及母淑人以孝聞又推產分讓其弟與鄉人處恂恂濡不爲崖異鄉人化之所爲卹孤賙急事甚衆不載載其鉅者如此初配淑人蔡氏卽母蔡淑人再從女侄也少婉嫕秀慧年十歲通女經女誡諸書父母竒愛之欲擇佳婿以公蔡甥有異質遂以歸公乃克相公以媚于舅姑實生司寇君暮月淑人遂卒生弘治壬子十二月廿二日卒正德庚辰六月十二日距淑人之逝蓋先公四十餘年及是始啓其窆而合

葬馬公子男六長百元庠生娶虞氏次百忠甲卒娶
傅氏次卽司寇君娶王氏累封淑人俱蔡出次某某
孫男十某某孫女五曾孫男十曾孫女三往司寇君
以御史按楚及撫治鄖陽俱有異政嘗爲余言吾所
兢兢於官守者皆以家大人之教也余楚人又與司
寇君同舉進士故志其事而爲之銘曰嗚呼是維長
者吳公之阡雙璧合焉爾之後蕃且賢爾之澤深且
綿天之報施善人固其然

素菴戴公墓誌銘

戴氏之先浙之湖州德清人也自素菴公客遊京

師從 先皇帝分封於郢居郢者三世及 今上皇
帝龍飛而素菴之孫良齊君用翊戴功歷陞錦衣衛
指揮僉事戴氏蓋三徙而其後益顯良齊公雖發家
武籍然好儒學所交皆當世宿學知名之士用能紹
麻恢業以大其宗嘗勸素菴公艱難造次歿四十餘
年而未有銘諸幽者持狀屬余請修其闕余鄉人也
誼不能辭按狀公諱景春號素菴父諱禮官兩淮鹽
運司政除武岡州生三子長景暉仲景暘公其季也
初武岡公之官時獨與長子俱而以仲子與公託諸
其友留京師從學無何武岡公卒於官而長子留楚

不知所之仲子居京師者亦歿以是戴氏譜牒世系
及武岡公宦跡官名俱莫可考公時甫十三羈旅寓
越乃棄儒治生贅於仁和倪氏成化丁酉先皇帝
將太封諸王募人充儀衛公以良家子應募事先
皇帝於西館弘治甲寅從之安陸以善製香得幸

先皇帝嘗親酒齋翰書咏茶詩以賜之正德丙寅
保陞總旗管理伍事方欲大用公而公以疾乞老遂
徙居七里灣竟卒公性沉重寡言人罕測其喜怒訓
子姪必以孝友禮法與鄉人處好名檢不爲苟容里
中少年有毆母者公欲與其父直諸有司寘之重典

少年懼叩頭流血請改公乃許之而其人亦痛自創
艾卒爲善士爲鄉里所重如此幼失父兄間關南北
備嘗艱阻能以勤儉力業積微至鉅蓋公之歿六年
而 上龍飛入踐大位凡 先皇帝舊臣靡不依日
月之末光或從輿隸取尊官大爵而公以早逝竟不
獲遇至其孫乃顯豈非命哉然其鏗懿淵積庇於後
者遠矣距公生于 年 月 日葬某山之原銘曰
龍欲升天雲爲翼真人之興多士集 先皇藩僚
盡英雋公也桓桓乃其一一朝 五位昇皇極翊戴
諸臣俱顯陟吁嗟靈兮倏已化附翼攀鱗恩世及故

續遺履蒙 宸億賞以世延賁殊錫譬彼黍稷公所

植身不及獲孫乃食七里新

許漢江側終馬允孫上云吉福汝後嗣千萬億

處士立齋高翁墓誌銘

高處士者兵部武選主事尚志祖也始武選與余同
舉於鄉嘉靖甲辰中會試以病不能 廷對丁未復
與余同舉進士是時武選年三十餘而處士翁尚無
恙及出宰海寧三年用廉能徵擢今官而處士乃卒
卒年七十有七高氏在邑中稱爲德門翁既壽考而
其子孫復貴於是人愈益嚮慕之矣嗟乎閭閻簪履
之家賢豪炳燁之士席位藉柄以矜名行猶不能庇

其後嗣而委巷野老煦煦慕義慶流子孫何哉語曰
人譽陽善鬼錄陰德彼茫茫然者其有知乎其無知
乎非通於幽明之故者又孰能無惑焉按狀翁諱綱
字惟振系出宋南平王崇文之後其先自大原徙也
始祖能靜能靜生鳳儀鳳儀生旭政旭政生伯溫伯
溫生翁十二歲而歿翁獨與楊氏居常自傷已不及
養其父歲時伏臘悲感動人故事楊至勤楊以守節
而終有司特表其墓翁毀瘠盡瘁哀思終身族黨稱
孝焉高氏故多貲及翁少孤家益落素所貸者人皆
負之翁揣知負者盡窘曰奈何以利故重困吾鄉人

乃棄券折負不復責償癸未歲大飢疫死者相枕翁
率子弟撤復屋材爲榱躬荷鍤埋之其治產取足衣
食不求餘度稍足自給卽以周宗族貧者里中新銳
少年或用睚眦怒鬪致訟公徐以一二言折之少年
往往感伏忿訟亦解其爲人所愛慕如此 今上詔
郡國三老孝弟力田七十以上者冠帶有司以翁應
詔歲終飲蠟常與賓焉翁於是始一攝冠履見官長
自他足不及城府所武選在海寧時用威嚴誅鋤強
硬邑中翕然稱治翁獨貽書誡之曰邑吏佐天子牧
養小民宜用寬仁行陰德何乃獨任法乎翁故長者

性喜忍不傷物卽所言不達吏理其意殆近厚矣翁所居一都里中諸長老素推不業儒迺翁獨好儒羣子弟延經師教之諸長老見翁所爲盡駭異不喜翁不爲變至翁子孫竟以儒顯而一都亦自是彬彬多文學之士埒於他里於是諸長老則人人喜多公能變厥俗也斯可謂一鄉之善士矣翁配管氏繼配薛氏生五子長允迪爲益府長司娶周氏管出也次允恭允升允中允達薛出也女二長適陳生宗儒次適張生文弼孫男九長卽武選君尚志公孫女八曾孫三長薦邑庠生次重慶幸慶尚幼曾孫女一以年月

日窆于雲臺橋之陽先計至京師武選君向余悲曰
吾幼長于祖今歿而不吾見也哀哉請爲之銘銘曰
繡林峩峩大江所經精縕靈結鬱生逸人澤及枯骨
古曰周文翁也編氓比德齊仁不雕自飾不式而成
韜光隱耀以裕後昆母曰蓋高索之冥冥視履考祥
鑒此刻銘

遼府承奉正王公墓誌銘

余在史局好具問先朝事見老璫數輩語及孝
廟時輒悲咽嗟乎敬皇帝之澤人人深矣其後見
遼府承奉王君亦弘治間人至論曩事尤能歷歷道

也嗟乎 敬皇帝誠聖主也墮弓遺鳥猶且重之況其舊臣乎宜爲志志曰王君諱大用字惟賢霸州大城縣人也事 敬皇帝時才弱冠侍 乾清坤寧爲奉御而慈壽皇太后居仁壽宮公在三宮間端慤自媚於上積功勞陞兵仗局左副使 毅皇帝親閱近侍儀貌魁傑者選置左右三月陞御馬監左少監是時 帝方好武中貴人皆習騎射 裘馬從獵上林諸苑而公獨周慎謙抑乃 帝顧喜公賜蟒服三襲遂陞大監內苑乘馬加資祿米二十石無何 毅皇帝上賓公侍大行几筵會 今上入繼大統中貴人

從代來者皆新幸用事而君自以先朝舊臣弗爲下
諸新幸並忌之遂出爲遼府承奉君在內庭久明習
國家事及至則悉條司中諸敝蠹啓王釐正之府中
頃 肅莊王薨今嗣王幼國太妃主政太妃賢諳習
書史沉敏有斷事無大小皆與決之君亦殫忠畢慮
克稱委任當是時太妃賢聞天下亦以有君輔之也
及王嗣爵以君國之耆碩恩禮尤殷王英敏聰達才
智絕人羣臣莫敢望也而君每事獻替卽有不可輒
力諫諫或犯顏王察其忠悃恒嘉納焉而性峭直以
莊見憚刻廉自律不受私賂莫可干以私侍御胡公

按楚者嘗顏其堂曰忠誠體國議謂無愧云然君始
用也特被恩寵業通顯矣一弗能少下親貴竟老外
藩嗟乎人之遇合誠有命也觀其卓然大節終始不
渝其誼有足稱者藉令久禁闈筦樞密如近代懷恩
蕭敬輩豈足多耶按狀公大父諱希杲父福能母李
氏兄四人琪璋現瑞皆早卒公所以撫養諸子者備
至多不悉錄生弘治戊申十二月卒年日卜江
陵郭西磨之原葬焉銘曰生于燕老于楚孰曰
信美而非吾土出於朝相於藩孰曰位屈而名則尊
彼何爲兮唯唯諾諾此何爲兮蹇蹇諤諤吁嗟君兮

尚寤無覺重冥之下亦足樂矣隆然者丘峯而崇鬱
哉佳氣烟雲重重公乎公乎藏骨于其中

勅封承德郎刑部山西司主事雲谷曹公墓表
語曰不知其父視其子不知其主視其所使此言積
習率化然也河南有隱君子曰雲谷曹公余不識雲
谷公而識公之仲子亨今縉紳中所稱曹仲子者也
始仲子憲副于楚扼強宗室治巨獄有能名楚人思
之遷浙江叅政無何奔雲谷公喪歸明年遣使持其
葬人所爲謄述公之行實走京師求表其墓乃余則
又獲知公之潛德隱行曰嗟乎曹仲子之賢蓋由世

德云雲谷公者諱大夏字子禹汝寧新蔡人也先世祖曰世隆居縣東胡庄至曾大父英始自東徙縣西九溝坡大父端父鳳舉進士稍遷至都察院右副都御史母劉孺人當 武皇帝時豎瑾竊國政勢若烈焰一旦不如意所夷滅者不可勝道而都憲公獨抗直不爲少屈遂爲瑾所陷至鬻其產以贖產且盡都憲公益窘公曰吾聞峴峴者易折皎皎者易汚大人以直道忤時命也苟不負所學雖終窶何憾是時公方弱冠其器識卓異如此踰年而都憲公卒卒六年公以儒士應試有司不錄乃退而躬耕嘉靖十三年

仲子始舉進士授刑部主事十五年 大祀覃恩封
公如其子官公傷都憲公之志爲書誡仲子曰嗟乎
吾先大夫以修正蒙難爲世名臣至于予而中廢乎
夫不辱其先之謂孝移以事君之謂忠而勉哉毋忘
吾所欲承繼先志者矣仲子則祇奉公命不敢墜以
故曹仲子之仕所至輒顯名守兗州日積俸金爲公
壽公却之曰吾欲汝以清白養不欲汝以金養且吾
自食其力何用金爲二十九年仲子徙浙江叅政也
自楚歸省是時公年六十餘仲子念公老業不欲行
公故強飲食振步以示尚健日趣行矣毋以吾爲念

仲公不敢留去一年所而公卒公生而瑩朗聲如鐘
磬既長博學無所不該尤善禮射楷書性至儉恥爲
豪侈其治產取足衣食不求餘夫豪子弟襲父兄餘
焰乘堅策肥過詫問里乃其常態而公以都憲子恒
力田自斂約同齊民當是時邑中賢士大夫皆多公
能摧強爲弱也與人交無論貴賤賢不肖皆處之無
忤所見卽善雖踈遠必願慕交納卽惡亦矜容不峻
絕人曰太渾矣公曰不然夫分別善惡賢賤不肖
者有司之事也吾爲鄉人與世大同而已安所不可
而欲沽沽自異乎于是邑中人愈益多公按狀載公

乏爲人如此隱不違親貞不絕俗殆近古所謂逸民者與夫世未嘗無瓌偉倜儻之士也或遠跡于鹿豕或泥蟠于巖穴乏青雲之媒闕驥尾之援長湮滅而無聞者多矣曹公以碩人之德棲遲考槃卽如勸都憲公以守正抗節與所以訓迪其子者斯亦無愧于當時之士矣乃竟不獲顯於時彼眈眈泆淫紆金紫而綰章綬者是遵何德哉先民有言譬彼農夫是穠是養雖有饑饉必有豐年曹公之賢至其子乃章所謂不于其躬于其子孫者乎公生成化甲辰終嘉靖辛亥年六十八配張氏封安人三男子長直庠生先

公卒次卽亨次夏崇府與膳五女子長適元鎮仲高
生季庠生蕭儒餘皆殤孫男五女三以 年 月
日葬于 之原史張氏取公行事勒之于石以詔
後人嗚呼凡厥子孫尚其瞻哉

新刻張太岳先生文集卷十四

軒皇問道治世長生頌

臣聞在昔受命之君有握符應運致世昇平者矣未必能長生也玄都羽客有御風躡景超舉青冥者矣未必能治世也兼而有之惟古之軒皇爲然史稱其正名百物監撫萬區淳化浹蟲蛾協氣蒸輿蓋其致治之盛旣如此閱世千禩乘雲上昇合金山之瑞符衍泰元之神筴其仙化之跡又如彼豈非後王之高躅古今所希覩者哉揆厥所由蓋嘗訪廣成於崆峒聞至道焉其辭曰抱神以靜形將自正心靜神清無

張太岳文集 卷十四

勞汝形無搖汝精乃可以長生夫至道之要以壽身
而其緒以壽天下固至人之妙詮而君天下之鴻寶
也彼異端者流撥虛崇誕謂軒皇受丹經傳九品及
服食金液之術豈不淺之乎闕聖闕哉仰惟 皇上
三極疑真千齡毓粹蚤徵靈瑞叶壽丘之符幼秉英
喆類徇齊之聖運暮 九重洽垂裳之化卜曆萬禩
契得天之紀若夫齋明祗栗寅奉 上帝合官祀也
燕閒遠穆服膺古訓巾几銘也提綱挈維式序在位
官師正也斲雕蠲頰阜殷兆人華胥俗也天聲綦隆
王會畢臻阪泉威也洪流循軌龍首效竒螭川圖也

巍巍焉煌煌焉所謂統一道真而迓治世長生之敬
者允與軒皇合轍也時維秋仲十有七日乃 聖誕
之辰薄海內外含生之倫罔不延睇雲霄稽顙 宸
闕以效華封之祝而臣叨首輔弼夙荷 隆恩慶忭
之忱實萬恒品謹博采軒皇治世長生之蹟而要歸
於王道托之丹青摘爲頌詩用祝 皇上萬萬歲壽
夫道者萬福之宗身者萬化之根道立而福不臻身
治而世不泰平者未之前聞也惟我 皇上味廣成
之至言遵軒皇之遐軌正心修身以會千聖之真保
精頤神以隆 五位之福則恩從祥風翔德與和氣

游百度咸熙乎易簡萬國畢登於仁壽 皇上方將
履乾久視撫泰長生後三光而不彫配霄極以俱永
斯非薄海際天所共欣願者哉臣誠不勝忠愛惓惓
謹作頌曰

上天佑民樹以后王疇膺大寶而化率光疇撫泰平
而壽彌昌倬惟軒皇河圖誕受統緝萬區羣元畢阜
巍巍駿功爲帝者首泰元鼎策得數之全康齡不老
度歲百千子孫萬葉配天永延匪直也斯淵源至道
齋心大庭崆峒是造佩服眞詮探玄洞與丕鍊我
皇寅御璿圖蚤徵靈瑞大電繞樞狗齊歌敏與軒同

符廣庭森嚴法宮淵靚出入起居作所惟敬疑真養
和體道自性綽哉運治禮陶樂鎔文明萬國協于時
邕外寧內謐華胥之風坐享昇平垂裳而理仰奉
寶慈式燕以喜祉綏九祐祥開百子節臨秋仲景
取彌申甲觀畫堂虹彩紛綸泰元神策與軒合真丘
拜稽首祝皇萬壽岡陵等堅松栢儷茂誕膺百歲
以昌厥後願言壽民濯痍煦寒願言壽國磐石孔
安化洽無垠聲垂不刊美哉至道壽身暨國如戶
有樞如星有極惟皇克念寶之無斃唐節天長九
齡納倣愚臣繪圖以代金鏡壽我聖皇無疆維慶

神母授圖萬年永賴頌

按道書雲笈七籤云雲華夫人居於具茨之山雲樓
玉臺碧宮瓊闕靈官侍衛獅子抱闕天馬戩圖毒龍
電獸八威備軒神禹造拜求治水之術夫人命侍女
凌容華出丹玉之笈開上清寶文以授禹遂能導波
決川奠五岳別九州以收地平天成之功萬世永賴
臣聞聖王膺天駿命君主萬方必有翼聖之貞符開
天之寶範乃克興造功業福彼元元粵若大禹奠五
岳導百川地平天成和寧四極啓闕以降神頌神靈
明德者歸焉世傳神母授禹玉笈寶文通水之理而

後禹得以施其疏鑿之力夫巍巍禹績萬世賴之非
有稟承其何能濟神授之積豈其爽哉洪惟我 聖
母慈聖宣文皇太后 聖善天成睿明神啓蚤膺符
命叶玄雲之徵兼苞藝文垂彤史之訓啓迪 英聖
則官闈之師保登翼太平則苐珈之堯舜蓋 天祐
我國家篤生 聖君爲億兆立極必鍾毓 聖母爲
一人開先非偶然者也先是涿水橫溢居者靡寧行
者病涉 上軫慈衷捐數萬之貲壘石爲梁以濟往
來俾徒旅獲如砥之安輿駟無濡輪之困日者河淮
汎汨災被郡國黎萌蕩析餽餽弗康 聖母感之特

論我 皇丞圖俾乂 神謨密運河伯效靈畚鍤方
興昏墊化爲甘壤壁馬未薦瀕洞儵爾安瀾䟽鑿之
功指掌可竟平成之烈跂足以湏微夫 慈誠內啓
休應響答疇克臻茲卓哉煌煌與神母授禹之符如
出一轍矣時維仲冬載臨 慶誕長樂之觴甫獻中
嵩之祝交騰而洪流適以循軌奏千里榮光六宮瑞
靄若有期會並映一時古稱聖神生河瀆應宣房塞
萬福來靈祇佑貺孰有殊尤燦爛若斯者乎臣叩首
輔弼荐被 渥恩快覩嘉祺慶躍無極敬繪神母授
禹圖摛爲聲詩庸申慶祝頌曰

皇矣 上帝幹運太清眷綏明德以奠羣生拔謨啓
聖厥符孔貞粵昔大禹疏河導谷遐清地紀仰正天
軸九州攸寧萬世禔福厥有神母瓊闕是居昇以靈
秘金簡綠書微禹若母兆人其魚於鑠我 皇功崇
德厚濬發祥源曰維 聖母鴻化翼登昭哉啓佑赫
赫天命 皇丕承之英英皇皇 母慈訓之奠丕丕
基兆人是依嗟彼河淮怒溢瀾漫萬室成淵千里無
岸我皇憂之永宵食旰請于 聖母聖母曰咨捐儲
簡僚滌源導文無留巨浸痛我遺黎 慈誠感通靈
峇如響陽侯息波支祁奠壤萬旅罷鍾千艦濟餉猗

嗟休績厥匪偶然禹功 帝烈接躅比肩遡惟母授
萬載同詮慶逢 慈誕泰元增筴海晏河清乾明坤
懌襲吉會昌靈休孔赫臣拜稽首 天子萬年福祿
來崇如日如川續禹之緒躡古無前臣拜稽首 聖
母萬壽永錫祚胤克昌厥後儷彼神母榮鏡宇宙敬
賡天保祈嘏祝釐炳若丹青綴以聲詩鏤之玉版配
天永垂

萬壽無疆頌

臣聞天之道惟純故能亘古今歷浩劫而其運不息
聖人之德惟純故能配天地宰民物而其壽無疆今

夫天茫茫漠漠溟溟濛濛鴻洞運於於穆之中超乎非想之外其純如此是以動而不居運而無積噓之爲陽吸之爲陰噓已復吸吸已復噓環之無端推之不窮彼星曆家以天道爲不可測也乃占斗建作甲乙日積爲歲歲積爲紀乘而爲十百千萬衍而爲元會運世其術雖精然天載之神非象數所窮上元肇於甲子而鴻濛之初爲甲子者不知其幾也萬世之後爲甲子者又不知其幾也以教窮天不知天者也聖道卽天道淵淵穆穆爲而不有長而不恃若是者其德純也故聖人之靈式居天上或降寰中或爲帝王而

長生治世或爲真宰而秉教司權其誕降也若有期
而生於無極之始先天以固存者也其應化也若有
迹而超乎無極之外後天而不老者也蓋道宰數數
難窮道故謂聖壽爲可數計者不知聖道者也仰惟
皇上以聰明神聖之資證元始沖一之道出王游衍
罔不在帝左右蓋純粹至精與天合一誕聖之初祭
兆河清帝曜光楚四紀于茲道化汪濊內恬外熙頽
禽素毳神芝靈草應圖而至將非至德極玄何能永
綏佑命若斯之盛乎茲秋仲十日爲靈風之期而景
度昌辰適與日會則自茲以往相推不窮卯卯會祥

旦旦逢吉循環之數昭然可觀矣而臣竊以爲
皇上之壽不可以幹枝時日之數計者亦如天之不
可以數窮耳昔絳縣老人計其生平四百甲子聞者
異之夫甲子而曰四百比之天道只旦暮耳星家以
帝堯之生起于日之癸月之巳星之元其筭一百二
十有七蓋得天地之中數也夫天道本無所謂始無
所謂中無所謂終今得數而曰中是有終也伏惟我
皇上受命穆清應真持世配天悠久巧曆所不能究
卽堯之適得中數者且不足以擬其盛而況可以甲
子計者乎臣不勝慶忭謹因玉景會元之旦拜手稽

首而獻頌曰

皇矣上帝運化於穆靜幹乾機默旋坤軸翕闢弛張
環輪共轂一元迭運終始相屬容成大撓謙首區公
布曆推筴仰則鴻濛三統五紀四分九宮機智可盡
太虛無窮穆穆聖皇配天建極緝熙至道罔遊于佚
功侔吹萬神存抱一獨化陶鈞基命宥密唯天曉德
俾熾而昌斂時五福以致萬方嶽祇貢祉則后輪藏
四靈畢至九譯來王在昔誕 聖流虹繞電今茲四
紀昌辰逢旦綠籍標年紫圖益算南極宵朗卿雲晝
爛古稱封禪七十二君皇風邈矣施板徒云亦有夏

靈爰及絳老八千何修四百何少蓬萊清淺或化爲
陸華彼嵩喬或淪爲谷夫惟大道虛無自然數不可
究言安能詮玄穹渾之宰化司權我 皇得之治世
長年紫宮絳闕金堂玉闕九華承蓋六氣扶輪夷猶
大始噓吸混元萬靈偕首率土皈尊宮哉皇哉浩劫
永存

聖壽無疆頌

臣聞天得一以清故常覆而四時行地得一以寧故
常載而萬物生聖人得一以貞故久道而天下化成
伏惟 皇上躬神聖之資履沖和之德握圖受命廿

有八載嗣大歷服壽考作人雖玄穹降佑有明蓋

皇上秉道合貞得一合符之明效也若夫道化汪濊

至治旁洽文德敷矣命將出師禦寇遠邁武功定矣
諸福之物可致之祥羣趨而畢至休徵應矣功德巍
巍如此嘉祥協應如彼故宜天壽平格神降之休然
皇上方且兢兢不倦圖惟永終由此推之天之保艾
我 聖躬寧有既乎昔周公美高宗享國之永召公
頌成王弗祿之康並載詩書光昭簡冊臣以淺薄謬
忝輔佐竊覩景命益昌 皇齡增算不任踴躍忻忭
之誠敢因誕聖之吉敬獻無疆頌一首文辭無陋雖

不足揚鴻休光聖治譬之候虫時鳥感氣而鳴亦莫
以發揮冥工仰答玄造者也謹頓首稽首而上頌曰
天門開兮仰穹蒼卿雲爛兮景星煌雲罕靄兮華蓋
張會百神兮發清商鼙鼓砰兮震巖廊王鏘琅兮引
鳴璫萬國集兮朝未央旅庭實兮擁珪璋獻萬壽兮
祝 聖皇天佑 皇兮作君師惟天惟大皇則之和
輯九有叙四夷端冕垂拱致雍熙明德馨香協神祇
和氣凝兮景福綏禎祥應兮日益滋應龍見兮昇殿
楫表靈異兮揚光輝皇之德兮荷帝禧荷帝之禧御
中區膺寶曆兮奉靈符驗日月兮散雲輶布太和兮

壽羣生匝宇宙兮華胥人山作杯兮河爲觥
粃沈隆兮吸玉精歲歲爲樂兮奉聖君
願億載兮有萬民壽如天兮以長存

得道長生頌

有序

臣聞黃虞以來英君諠辟應運而興者載之史冊班班可考臣竊以爲皆有聖人之資而未備聖人之道也夫道包絡宇宙滂漉羣生恢之彌形想之外總會太乙之先是萬物之始經緯之紀也聖人者本始以知萬物之源治紀以知經緯之端故虛愉恬靖湛然守一知常襲明淵乎莫得而窺焉以此養生則抱

一合虛攝有歸真與天地同其悠久矣以此治天下則執簡握機因應隨化使知者效其畫材者畢其能而明主不勞而治功成矣故巖棲谷飲絕粒喻精者守形之士也雖苦而無成探策岱宗馳馭崑崙者荒唐之轍也或誕而不經自非至聖孰能與之恭惟我皇上履運中興撫世立極躬稟神聖之資而又兼備神聖之道澄心於於穆握紀於精微受命以來修政一度釐典飭工制作軼百王謨烈光 列聖文德昭矣法太乙以命將按五雷以治兵南戡北掃玄武布帛雖有小醜孽逆旋起旋滅武功定矣黃祇效順幽

明叶應虔修大典以昭事上帝溥海內外無不仰
庇玄庥道化成矣然皇上身不出乎軒陛而化已
行於域中機獨運於玄冥而應已響於寰宇賞一行
則雨露均濡威一振則威靈同迅人但知神功偉烈
超越百代夫孰知皇上淵衷之默宰乎蓋聖人之
道內以養生外以治天下其要甚微而其功甚逸我
皇上蓋獨得之矣是以天壽平格神降之休高真擁
佑景福茂增神芝靈草徧滿五嶽揚光獻瑞而來者
不可縷數由此推之則天之保艾我聖躬豈有既
乎臣末學淺陋管窺蠡測蒙皇上簡擢真之近地

仰贊玄修臣誠惶恐慮無以報稱者敬因誕 聖之
吉敢拜手稽首而獻頌曰

維明聿興昊天有命篤生我 皇膺曆啓運電繞虹
流楚分光映厥祥伊何日維誕聖

右一章聖人出

龍飛清漢矯翼天閭肆煥其大號改度易章肆九伐
七伐肅彼遠方海外有截荒服來王

右二章御六龍

皇在九五神道設教得一惟貞同玄體妙機運高
清
功施海澨譬彼日月幽巖朗照

引大正文身 第一
右三章合神符

受千福百祥自天降康緊我 后靡怠昭事皇皇對
越伊邇盼蠻孔彰惟此明德格於穹蒼

右四章告成功

煌煌靈芝萬年一秀今獨何爲光徧宇宙曰天子萬
年受天之祐何以媿之昔唯軒后

右五章永玄庥

雖肅殿箴

北極紫宮惟皇宅中身爲民表心與天通斯須不和
則乖戾起斯須不敬則傲慢叢念常生於所忽禍乃

發於無窮是以聖人事心天命是勅欽厥止日謹萬
幾處深宮心周八極不以嗜欲滑和不以逸豫滅德
無作好無作惡藹藹熙熙如春斯煦無荒色無荒會
兢兢惕惕如淵斯臨勿謂燕閒人莫與觀一喜一怒
作人煥寒絃急者絕器平者安優優和衷爲君實難
勿謂宥密人莫與弼一動一言恒爲度律危懼則存
驕泰則失昭昭神明相在邇室在昔成周宇內太和
由雖雖其在宮友琴瑟而不頗亦曰懿恭小民懷保
由肅肅其在廟克對揚於祖考我皇膺哲是謂
智臨匪高明之不足貴育德於靜深我皇撫運是

謂開泰匪豐享之丕臻懼此心之或佚樂以平其情
雖鐘簋不設而若聞希聲然後心和氣和而天下平
禮以飭其志雖升降未施而若持重器斯謂無逸乃
逸而天下治故曰冲和者養威澹泊者養祿色勵者
養安憂勤者養樂以古爲師于何不儀平平周道惟
皇建之以心爲鑑于何不見穆穆文王惟 皇所憲
朽索在手勿謂無傷覆車在睫奈何弗防和不可流
敬不可怠慎終如始萬壽無疆

聖母圖贊

附寶感電

黃帝母曰附寶見電光
繞北斗極星感而生帝

軒轅聖母厥有靈符燁燁神電明輝天樞精通景貺
慶啓瑤圖紀雲迎日百王所模天開皇統其兆則殊
女節應星

有美軒妃神風遐邵腕彼長虹中天垂耀光流華渚
於昭慶兆乃誕金天首弘帝道不有聖跡曷彰靈造
慶都毓聖

大哉唐帝德與天同靈鍾聖母冥感神通玄雲入戶
亦龍在宮遂開景運萬國時雍濟濟岳牧是謂雲龍
塗山翼夏

禹錫玄圭周行四隩啓生而出八年不復實有塗山

內裏椒屋遂登夏道永承天祿澤遠淵深昭哉有淑
簡狄生商

於饒聖緒長發其祥瑤臺有女玄鳥來翔乃遺之卵
覆於玉筐簡狄吞之感而生商玄王之胤是爲成湯

太妊胎教

立教之方罔不在始思齋太妊震夙聖子視聽有儀
周旋中禮所以文王緝熙敬止穆穆母儀光於國史

太姒嗣音

姒氏繼任益彰內治南國化行德音是嗣誕武興周
自昌而熾穆本益斯壺行純備葛翠垂詠光範來季

明德崇儉

富貴惜福天佑益隆明德偉識儉素是崇身服大練
化行漢宮裁抑外家克已示公弼明翊章邈矣休風
長孫進賢

唐宗烈烈踵美三王實維哲后左右椒房調和直諒
獎進忠良用俾房魏勲庸顯彰煌煌彤管千載遺芳
宣仁守舊

宋哲冲年握圖在宥尚賴王母單心擁佑政必法祖
入惟求舊一洗熙寧化爲元祐休哉女德唐虞比懋
接引佛讚

妙湛弘慈兩足尊能以總持不動力拔諸沉淪出苦
海引入毘盧大寶閣我願學及無學人自度度他智
無碍畢竟無有得度者是則名爲天人師

鐘鼎硯銘

鑄之端山之陽登之翰墨之場胡舍其鏗鏗鏗鏗而
爲磷磷琅琅發其條理翊我文章將以鳴治世之盛
而垂述作之光

工科左給事中丘岳并妻勅命一道

奉 天承運 皇帝勅曰國家倣古諫議之職分設
六科慎簡才賢寘諸近列咨其獻納之猷異宸敷旨

之績厥惟重矣非端慎明允練國章而識治體者烏能勝斯任乎爾工科左給事中丘岳清素勵於持操敏達優於服政昔居劇邑夙著賢聲繼陟諫垣益隆譽問銓書奏最亟用嘉焉茲特進爾階徵仕郎錫之勅命以爲爾榮夫古人不慕專城之柄符竹之榮而願出入禁闥者爲其身依清近而雅言易聞也爾尚以古之賢臣自期勵志紆猷拾遺補闕用禪治化之成無負掄授之意其爾尚亦有顯陟矣欽哉勅曰爲人臣者靖共以事君爲人婦者淑慎以相夫其道一也故國家推恩臣下並及其配焉所以勸交儆厚

人倫也爾工科左給事中丘岳妻黃氏夙閑姆訓克慎婦儀綜理惟勤柔嘉維則其賢足徵矣茲特封爾爲孺人尚其無忘鷄鳴之誼以永燕譽之休

工科左給事中丘岳父母勅命一道

奉 天承運 皇帝勅曰朕聞植根深者不期茂而自茂植德深者不期昌而自昌故丘園之子考槃之人身或不食而後乃榮茂茲天道也爾丘尚忠乃工科左給事中丘岳之父孝友著於家庭恂實表乎閭里享不副德而有子登庸斯亦足以成厥志矣用贈爾爲徵仕郎工科左給事中秩命之榮具如其子雖

祿養之弗逮而潛德之已彰冥漠有知服茲寵錫
勅曰母之于子不獨內愛篤也蓋亦有義方之訓焉
故國家寵命臣工必偕及其父母示罔極之恩同嚴
親之教一也爾熊氏乃工科左給事中丘岳之母勤
淑相夫式修壺範端嚴教子丕著母儀茲特封爾爲
太孺人遠貽閨闈之光用介期頤之祉

奏爲辭免恩命事

隆慶元年二月初九日准吏部咨節奉 勅諭原講
官今禮部右侍郎兼翰林院學士張 陞吏部左侍
郎兼東閣大學士著入內閣同徐階等辦事如勅奉

引大書之集 卷一
行欽此非常之命特出宸衷不次之恩濫及庸品臣不勝感激不勝惶悚竊以內閣之職幾務是司以代王言以熙帝載必有宏深奧衍之學蘊經綸康濟之才然後足以協贊皇猷弼成聖化臣學不足以造古人之微識不足以通當世之務既無才望又鮮集勞徒以東朝勸講之微勤幸逢聖主龍飛之景運因緣際遇驟被恩慈擢貳銓衡晉叅密勿力微於蚊蠅任重於丘山退自省循若爲堪受昔唐李泌陸贄遇代德二主於藩邸先臣楊溥劉健事仁孝兩廟於青宮咸以舊勞遂躋台席

然當時不以爲倖得後世咸仰其休聲者蓋以四臣
聞望素隆勲庸茂著故也臣之謏劣何足以遠企前
賢近希先哲而一旦以後進之士厠迹於老成者舊
之間以庸衆之流濫竽於俊乂英賢之列將何以致
物情之允協昭 天鑒之無私卽微人言能不自愧
況 聖明臨御之始正海內觀聽之時倘舉措不愜
於公評則激勸有虧於 國典墜顛之咎寧獨在臣
伏願 皇上察臣悃誠非由矯飾特停成命改授時
賢俾臣仍以舊官勉圖自効庶程才量力在微臣免
餽覆之憂爲官擇人在 國家有棟隆之吉臣無任

戰慄隕越矣 命之至

奏爲遵詔自陳不職乞賜罷斥以光新政事

臣復覩 詔書內一款六部等衙門四品以上官并
學士俱著自陳去留取自 上裁欽此伏念臣以一
介草茅叨塵法從粵從潛邸獲侍 講筵雖葵藿之
忱向傾爲切奈疲駑之質驅策難前聞見空踈無以
備 詢咨而裨 聖學文詞蹇拙無以參著作而藻
皇猷退自省循蔑聞一善虛糜廩祿已踰廿年茲
聖明蒞政之初正人心願治之日所宜汰除冗曠登
進賢良振興勵翼之風大明黜陟之典而臣猥以瑣

質濫長詞林徒積罪戾之多豈稱清華之選伏望
皇上普離明而察衆職奮乾斷以警官邪如臣庸愚
特賜罷斥庶品流有別非才不得以苟容觀聽一新
賢者無妨於登用其於初政實爲有光臣無任戰慄
頽越懇祈俟罪之至

新刻張太岳先生文集卷十四終